

**დამტკიცებულია:**  
**ა(ა)იპ „გიორგი მთაწმინდელის სახელობის**  
**გალობის უნივერსიტეტის“ რექტორის 2023 წლის 08 დეკემბრის**  
**№03 ბრძანებით (დანართი 28)**

**ა(ა)იპ „გიორგი მთაწმინდელის სახელობის გალობის უნივერსიტეტში“**  
**პლაგიატის აღმოჩენის, მისი თავიდან აცილებისა და პლაგიატის შემთხვევაზე**  
**რეაგირების წესი**

**მუხლი 1. ზოგადი დებულებები**

1. პლაგიატის აღმოჩენის, მისი თავიდან აცილებისა და პლაგიატის შემთხვევაზე რეაგირების წესი (შემდგომში - „წესი“) ადგენს ა(ა)იპ „გიორგი მთაწმინდელის სახელობის გალობის უნივერსიტეტში“ (შემდგომში - „უნივერსიტეტი“) პლაგიატის აღმოჩენის, მისი თავიდან აცილებისა და პლაგიატის შემთხვევაზე რეაგირების მექანიზმებს.
2. ამ წესის მიზნებისთვის სტუდენტი არის ნებისმიერი პირი, რომელიც სწავლობს უნივერსიტეტში და იღებს შესაბამის საგანმანათლებლო მომსახურებას.
3. ამ წესის მოქმედება ვრცელდება როგორც სტუდენტზე, ასევე აკადემიურ, სამეცნიერო, მოწვეულ და ადმინისტრაციულ პერსონალზე.

**მუხლი 2. წესის მიზანი**

უნივერსიტეტის უმთავრეს პრინციპს წარმოადგენს აკადემიური კეთილსინდისიერებისა და ინტელექტუალური საკუთრების დაცვა. ამ პრინციპიდან გამომდინარე წესის მიზანს წარმოადგენს უნივერსიტეტის სივრცეში ნებისმიერი ფორმის პლაგიატის აღმოჩენა, რათა სამომავლოდ თავიდან იქნეს აცილებული სხვისი ინტელექტუალური საკუთრების მითვისება.

**მუხლი 3. პლაგიატის ფორმები**

არსებობს პლაგიატის შემდეგი ფორმები:

- ა) პირდაპირი პლაგიატი - სხვისი ნამუშევრის მითვისება ავტორის მითითების გარეშე, ასევე წყაროდან სიტყვა-სიტყვით გადმოწერა ციტირების ან მითითების გარეშე;
- ბ) პარაფრაზირებული პლაგიატი - სხვისი მოსაზრებების პარაფრაზი ავტორის ერთმნიშვნელოვანი მითითების გარეშე. პარაფრაზირებული პლაგიატია ასევე პარაფრაზისას ავტორის სიტყვების უმნიშვნელო ცვლილება, რაც ავტორობის საკითხს ბუნდოვანს ხდის;
- გ) მოზაიკური პლაგიატი - სხვადასხვა წყაროებიდან აღებული მოსაზრებების გაერთიანება ცალკეული ავტორების მითითების გარეშე;
- დ) თვითპლაგიატი - საკუთარი ნაშრომის ან ნაშრომის მნიშვნელოვანი ნაწილების ორჯერ ან მეტჯერ წარდგენა/გამოქვეყნება საკუთარი ნაშრომის ციტირების გარეშე;
- ე) შემთხვევითი პლაგიატი - კვლევის დროს დაშვებული დაუდევრობა, რაც, შედეგის გათვალისწინებით ისეთივე დარღვევაა, როგორც პირდაპირი პლაგიატი;

ვ) ფარული თანამშრომლობა სხვების მოტყუების მიზნით - აკადემიური არაკეთილსინდისიერების ფორმა, რომელიც შეიძლება მოიცავდეს სხვა პირისგან მიღებული დახმარების არაღიარებას, ჯგუფურ პროექტზე მუშაობისთვის დადგენილი წესების არ გათვალისწინებას;

ზ) ნამუშევრის ან მისი ნაწილის სხვა პირისგან შექმნა და მისი საკუთარ ნაშრომად წარმოჩენა.

#### **მუხლი 4. პლაგიატის თავიდან ასაცილებლად გასატარებელი ღონისძიებები**

1. უნივერსიტეტი პლაგიატის პრევენციისთვის გეგმავს და ახორციელებს სხვადასხვა სახის ღონისძიებებს:

ა) უზრუნველყოფს შიდა საუნივერსიტეტო ბაზის შექმნას, სადაც განთავსდება სტუდენტთა ნაშრომები (პრეზენტაციები, რეფერატები, სამაგისტრო ნაშრომები, ჯგუფური პროექტები და სხვა);

ბ) უზრუნველყოფს აკადემიური, სამეცნიერო, მოწვეული, ადმინისტრაციული პერსონალის/სტუდენტებისთვის საინფორმაციო შეხვედრების მოწყობას და მათი ცნობიერების ამაღლებას პლაგიატთან დაკავშირებულ საკითხებზე;

გ) ელექტრონული პროგრამის მეშვეობით ახორციელებს სტუდენტთა მიერ წარმოდგენილი ნაშრომების (სამაგისტრო) შემოწმებას პლაგიატზე;

დ) უზრუნველყოფს ინსტრუქციების შემუშავებას სწორი ციტირებისა და პლაგიატის თავიდან აცილების მიზნით;

ე) უზრუნველყოფს სტუდენტების/აკადემიური პერსონალის ინფორმირებას გამოვლენილ არაკეთილსინდისიერ შემთხვევებზე;

ვ) აკადემიური პერსონალი უზრუნველყოფს სტუდენტისთვის ინფორმაციის მიწოდებას მათ მიერ შესასრულებელ წერით დავალებაში/ნაშრომში/ჯგუფურ პროექტში პლაგიატის შემოწმებისა და შესაბამისი ღონისძიებების გატარების შესახებ.

#### **მუხლი 5. პლაგიატის აღმოჩენის მექანიზმები**

1. პლაგიატის აღმოჩენის მექანიზმებია:

ა) აკადემიური პერსონალის, რეცენზენტის, ასევე სტუდენტის შეფასების პროცესში ჩართული სხვა პირის მიერ ნაშრომის შეფასება და შესაბამისი დასკვნის მომზადება;

ბ) პლაგიატის აღმოჩენის სპეციალური პროგრამის (TURNITIN) გამოყენება ;

გ) აკადემიური, სამეცნიერო, მოწვეული, ადმინისტრაციული პერსონალის შემთხვევაში, პერსონალის მიერ მომზადებული ნაშრომის ექსპერტიზა (ელექტრონული პროგრამის გამოყენებით) გამოქვეყნებამდე.

2. სტუდენტის შემთხვევაში დავალების/ნაშრომის/ჯგუფური პროექტის შეფასებისას ამ მუხლის პირველი პუნქტის „ა“ ქვეპუნქტში მითითებული პირი უზრუნველყოფს ნაშრომის შემოწმებას შემდეგი პრინციპის დაცვით:

ა) ახდენს ნაშრომის სქოლიოში მითითებული ლიტერატურის შედარებას ნაშრომის შინაარსთან;

ბ) წარმოდგენილ ნაშრომს ადარებს სხვა სტუდენტების მიერ შესრულებულ მსგავსი შინაარსის ნაშრომებთან.

3. ანტიპლაგიატის პროგრამაში შექმნილი ანგარიშის გამოყენებით სტუდენტს უფლება აქვს შეამოწმოს საკუთარი ნაშრომი.

4. სტუდენტის სამაგისტრო ნაშრომი დასაცავად წარდგენამდე მოწმდება ანტიპლაგიატის პროგრამაში სამაგისტრო ნაშრომის ხელმძღვანელის მიერ.
5. აკადემიური პერსონალის მიერ მომზადებული ნაშრომები გამოქვეყნებამდე შესამოწმებლად ეგზავნებათ შესაბამის სპეციალისტებს, ასევე მოწმდება ანტიპლაგიატის პროგრამაში ფაკულტეტის მიერ.

## **მუხლი 6. პლაგიატზე რეაგირება**

1. სტუდენტის ან აკადემიური პერსონალის ნაშრომში გამოვლენილი პლაგიატის ნიშნების შემთხვევაში უნივერსიტეტის „ეთიკის კოდექსითა“ და „შრომის შინაგანაწესით“ დადგენილი წესის შესაბამისად იქმნება შესაბამისი კომისია, (გარდა ამ მუხლის მე-2 პუნქტით გათვალისწინებული შემთხვევისა) რომელიც უზრუნველყოფს საკითხის შესწავლას და დისციპლინური პასუხისმგებლობის შესაბამისი ღონისძიების გატარებას.
2. სტუდენტის ნამუშევარში (პრეზენტაცია/ჯგუფური პროექტი) გამოვლენილი პლაგიატის დროს ლექტორი სტუდენტს უფორმებს შეფასებას „0“. სტუდენტი არ არის უფლებამოსილი იმავე სემესტრში განმეორებით შეასრულოს ნამუშევარი. იმ შემთხვევაში, თუ სტუდენტი არ ეთანხმება ლექტორის შეფასებას მიმართავს რექტორს, რომელიც ქმნის ეთიკის კომისიას საკითხის შესწავლის მიზნით.
3. სამაგისტრო ნაშრომში გამოვლენილი პლაგიატის დროს ეთიკის კომისია დარღვევის სიმძიმიდან გამომდინარე უფლებამოსილია მიიღოს გადაწყვეტილება საყვედურის გამოცხადების შესახებ, ან სტუდენტის სტატუსის შეწყვეტის (ანტიპლაგიატის პროგრამის გამიზნულად შეცდომაში შეყვანა სხვადასხვა ტექნიკური მაქინაციით) შესახებ. ნაშრომი შეფასდება „0“ ქულით. სტუდენტი უფლებამოსილია გადაამუშავოს ნაშრომი და განმეორებით წარადგინოს მომდევნო სემესტრში. იმ შემთხვევაში, თუ პლაგიატის ნიშნები აღმოჩნდება კვალიფიკაციის მინიჭების შემდეგ, ეთიკის კომისია უფლებამოსილია დაინტერესებული პირის განცხადების საფუძველზე შეისწავლოს საკითხი, პლაგიატის დადასტურების შემთხვევაში უნივერსიტეტის რექტორი უფლებამოსილია მიიღოს გადაწყვეტილება კვალიფიკაციის გაუქმების შესახებ.

## **მუხლი 7. დასკვნითი დებულებები**

1. წესი დამტკიცდეს რექტორის ბრძანებით.
2. წესში ცვლილებების ან/და დამატებების შეტანა, მისი ძალადაკარგულად გამოცხადება ან/და ახალი რედაქციის დამტკიცება ხორციელდება რექტორის ბრძანების საფუძველზე.
3. წესი ამოქმედდეს დამტკიცებისთანავე.